

Սակագնային մարժայի համաձայնագիր

ք. Երևան
«_____» _____ 200_թ.

Հայաստանի Հանրապետության Էներգետիկայի կարգավորող հանձնաժողովը (այսուհետև՝ հանձնաժողով), որը գործում է «Էներգետիկայի մասին» ՀՀ օրենքի հիման վրա և ռազմավարական ներդրողը՝

_____, ընկերությունը,
ընկերության անվանումը
_____,
հասցեն
ի _____ դեմս

_____,
պաշտոնը, անունը, ազգանունը

որը գործում է _____

հիման վրա, հիմք ընդունելով «Հայաստանի Հանրապետության պետական գույքի մասնավորեցման 1998-2000 թվականների ծրագրի մասին» Հայաստանի Հանրապետության օրենքում լրացում կատարելու և «Երևանի էլեկտրացանց», «Հյուսիսային էլեկտրացանց», «Հարավային էլեկտրացանց» և «Կենտրոնական էլեկտրացանց» փակ բաժնետիրական ընկերությունների մասնավորեցման մասին» ՀՀ օրենքը, կնքեցին սույն սակագնային համաձայնագիրը հետևյալի մասին.

1. Համաձայն «Հայաստանի Հանրապետության պետական գույքի մասնավորեցման 1998-2000 թվականների ծրագրի մասին» Հայաստանի Հանրապետության օրենքում լրացում կատարելու և «Երևանի էլեկտրացանց», «Հյուսիսային էլեկտրացանց», «Հարավային էլեկտրացանց» և «Կենտրոնական էլեկտրացանց» փակ բաժնետիրական ընկերությունների մասնավորեցման մասին» ՀՀ օրենքի 9-րդ հոդվածի 1-ին կետում ամրագրված պայմանի,

բաժնետոմսերի առուվաճառքի պայմանագրի ստորագրման պահից մինչև 2004 թվականի հունվարի 1-ը բաշխիչ նոր ընկերության համար կգործի ԱՄՆ-ի արժույթով արտահայտված անփոփոխ սակագնային մարժա, որն առանց ԱԱՀ-ի մեկ կՎտժ-ի դիմաց կկազմի 1.35 ԱՄՆ ցենտին համարժեք դրամ:

2. Հետագա տարիներին՝ սկսած 2004 թվականի հունվարի 1-ից, բաշխիչ նոր ընկերությունների համար սակագնային մարժան կհաշվարկվի հանձնաժողովի սահմանած մեթոդաբանությամբ, որի հիմքում դրված է ընկերությանը անհրաժեշտ հասույթի ապահովման սկզբունքը, այսինքն՝

Անհրաժեշտ հասույթ = Շահագործման և պահպանման ծախսեր +
+ Մաշվածք + Գնված էլեկտրաէներգիայի արժեք + Հարկեր +
+ Անհուսալի դեբիտորական պարտքեր + Թույլատրելի զուտ շահույթ,
որտեղ՝

Շահագործման և պահպանման ծախսերը կընդգրկեն հանձնաժողովի կողմից թույլատրված տեխնիկական սպասարկման և նորոգման, շահագործման համար անհրաժեշտ նյութերի ծախսերը, աշխատավարձը, պարտադիր սոցիալական ապահովագրության վճարները, վարչական, կառավարման, իրացման և ընդհանուր բնույթի այլ ծախսեր:

Մաշվածքը կհաշվարկվի նոր ընկերության, մրցույթի արդյունքում ձևավորված, հիմնական ակտիվների արժեքի և հետագա ներդրումների գումարից՝ գծային եղանակով, ելնելով ակտիվների կյանքի տևողությունից: Ընկերության սեփականաշնորհման պահին ձևավորված ակտիվները պետք է ամորտիզացվեն տարեկան միջին կշռությային 5%-ի չափով:

Գնված էլեկտրաէներգիայի արժեքը կորոշվի հետևյալ բանաձևով.

Գնված էլեկտրաէներգիայի արժեք = [Իրացված էլեկտրաէներգիայի քանակություն : (1- Հանձնաժողովի կողմից թույլատրված կորուստների նորմ)] x Էլեկտրաէներգիայի գնման միջին կշռությային սակագին:

Հարկերը (բացառությամբ ԱԱՀ-ի) կհաշվարկվեն ՀՀ հարկային օրենսդրության համաձայն՝ հիմք ընդունելով սակագնային մարժայի հաշվարկում ընդունված հասույթը և ծախսերը:

Անհուսալի դեբիտորական պարտքերը, որոնք իրենցից ներկայացնում են ընկերության կողմից սպառողներին առաքված, սակայն չվճարված էլեկտրաէներգիայի արժեքը կներառվեն անհրաժեշտ հասույթի կազմում, բայց ոչ ավել քան առաքված էլեկտրաէներգիայի արժեքի 2%-ի չափով:

Թույլատրելի զուտ շահույթը կորոշվի հետևյալ բանաձևով.

Թույլատրելի զուտ շահույթ = Շահույթի հաշվարկման բազա x Ակտիվների շահութաբերության նորմ = [Նոր ընկերության հիմնական ակտիվների սկզբնական հաշվեկշռային արժեք + փակման օրից մինչև սակագնային մարժայի վերանայման պահը օգտակար և օգտագործվող ակտիվներում կուտակված ներդրումներ + Հանձնաժողովի կողմից ընդունված անհրաժեշտ շրջանառու կապիտալ - Կուտակված մաշվածք] x Ակտիվների շահութաբերության նորմ:

Նոր ընկերության հիմնական ակտիվների սկզբնական հաշվեկշռային արժեքը կհաշվարկվի որպես մրցույթի արդյունքում ձևավորված բաժնետոմսերի 100%-ի արժեքի և, համաձայն առուվաճառքի պայմանագրի, նոր ընկերությանը փոխանցված պարտավորությունների գումար:

Սակագնային մարժան կորոշվի հետևյալ բանաձևով.

Սակագնային մարժա = (Անհրաժեշտ հասույթ : Իրացված էլեկտրաէներգիայի քանակություն) - էլեկտրաէներգիայի գնման միջին կշռութային սակագին:

3. 2004-2008թթ. ժամանակահատվածի յուրաքանչյուր օրացուցային տարում հանձնաժողովը կընդունի ակտիվների շահութաբերության 16,0% հաշվարկային նորմ՝ շահույթի հաշվարկման բազայի նկատմամբ:

Հետագա տարիների համար՝ սկսած 2009 թվականից, ակտիվների շահութաբերության նորմը կսահմանվի հանձնաժողովի կողմից՝ ելնելով Հայաստանում ռիսկի նույն

մակարդակով գործող արդյունաբերական ընկերությունների շահութաբերության վերլուծությունից՝ հաշվի առնելով, որ բաշխիչ նոր ընկերությունը պետք է հնարավորություն ունենա ներգրավել նոր կապիտալ:

4. Բաշխիչ ընկերություններին վաճառվող էլեկտրաէներգիայի սակագների՝ հանձնաժողովի կողմից փոփոխության դեպքում, համապատասխան փոփոխությունների կենթարկվեն՝

- ◆ 2001-2003 թվականների ընթացքում՝ միայն սպառողներին էլեկտրաէներգիայի վաճառքի մանրածախ սակագները, համաձայն օրենքի այդ ժամանակահատվածում ապահովելով անփոփոխ սակագնային մարժա.
- ◆ 2004 թվականից սկսած՝ ինչպես սպառողներին էլեկտրաէներգիայի վաճառքի մանրածախ սակագները, այնպես էլ բաշխիչ ընկերությունների սակագնային մարժան այն մասով, որը վերաբերում է հանձնաժողովի կողմից թույլատրելի համարվող կորուստների արժեքին:

5. Հաշվի առնելով, որ.

բաշխիչ ընկերությունների մասնավորեցման մասին օրենքով 2001-2003թթ. ընթացքում պահպանվում է գործող (1.35 ցենտ/կՎտժ) սակագնային մարժան, որի հաշվարկում ընդգրկված է միայն անխուսափելի տեխնիկական կորուստների արժեքը

գոյություն ունեցող ոչ տեխնիկական բնույթի (առևտրային) կորուստների վերացման համար կպահանջվի որոշակի ժամանակ և ներդրումներ

«Էներգետիկայի մասին» ՀՀ նոր օրենքով և մասնավորեցման պայմանագրով բաշխիչ ընկերությունները պարտավոր են մեծածախ շուկայում գնված էլեկտրական էներգիայի դիմաց ապահովել 100% վճարումներ, որի պայմաններում ընկերությունները կկրեն որոշակի վնասներ,

Սահմանվում է, որ 2001-2003թթ. սակագնային մարժայի հաշվարկում չներառված առևտրային կորուստներից առաջացած վնասները կհաշվարկվեն՝ 2001-2002թթ. համար 4%-ի, իսկ 2003թ. համար 2%-ի չափով՝ գնված էլեկտրաէներգիայի արժեքից և կհատուցվի հետևյալ կարգով.

հաշվարկված վնասի արժեքը չի գումարվի շահույթի հաշվարկման բազային և նրա վրա չի տարածվի 16% շահութաբերության նորման,

հաշվարկված վնասի արժեքը կհատուցվի սկսած 2004 թվականից՝ ոչ ուշ քան 4 տարվա ընթացքում, հաշվի առնելով դրամի ժամանակային արժեքը՝ ներդրումային վարկերի միջին դրույքաչափին հավասար դիսկոնտի դրույքաչափով:

6. 2001-2003թթ. օրենքով սահմանված անփոփոխ սակագնային մարժայի գործողության ժամանակահատվածում իրականացված ներդրումների թույլատրվող զուտ շահույթը կհաշվարկվի 16,0% դրույքաչափով և սկսած 2004 թվականից այն կհատուցվի ոչ ուշ, քան չորս տարվա ընթացքում հաշվի առնելով դրամի ժամանակային արժեքը՝ դիսկոնտի 16.0% դրույքաչափով:
7. 2004թ. սկսած յուրաքանչյուր օրացուցային տարում ընկերության ակտիվների իրական շահութաբերության՝ սակագնային մարժայում հաստատված նորմից շեղվելու դեպքում, եթե այդ շեղման չափը կազմում է 1,0 տոկոսային կետից ավելի, ապա լրացուցիչ շահույթի (վնասի) 50%-ը հանվում է (գումարվում է) հաջորդ օրացուցային տարվա անհրաժեշտ հասույթից (հասույթին): Շեղման չափը որոշելիս ընթացիկ տարվա շեղումը անտեսվում է: Ընկերության շահագործման և պահպանման ծախսերի, էլեկտրաէներգիայի կորուստների և անհուսալի դեբիտորական պարտքերի՝ սակագնային մարժայի հաշվարկում նախատեսված չափերը գերազանցելու պատճառով առաջացած շահույթի նվազումը հետագայում փոխհատուցման ենթակա չէ:
8. Սակագները հաշվարկվում են ՀՀ պետական բյուջեի հիմքում դրված ԱՄՆ դոլարի և ՀՀ դրամի տվյալ տարվա հաշվարկային միջին փոխարժեքի հիման վրա և սահմանվում են ՀՀ դրամով: Եթե ՀՀ կենտրոնական բանկի պաշտոնական տվյալներով փաստացի միջին փոխարժեքը շեղվում է հաշվարկայինից, ապա կարող է կատարվել սակագների և սակագնային մարժայի ճշգրտում, բայց ոչ հաճախ, քան 6 ամիսը մեկ:

2001-2003թթ. կատարվում է դրամով արտահայտված սակագնային մարժայի ճշգրտում այնպես, որ տարվա կտրվածքով պահպանվի օրենքով սահմանված 1.35 ԱՄՆ ցենտ/կՎտժ մարժայի միջին կշռության մեծությունը:

2004թ. սկսած փոխարժեքի փոփոխությունը հաշվի կառնվի միայն սակագնային մարժայի հաշվարկում ներառված արտասահմանյան տարադրամով կատարված ծախսերի և շահույթի մասով: ՀՀ դրամով կատարվող ծախսերի փոփոխությունը կապված ներքին շուկայում գների փոփոխման հետ հաշվի կառնվի սակագների վերանայման համար սահմանված կարգով:

Փոխարժեքի տատանումների պատճառով ընկերությունում առաջացած վնասը (շահույթը) հաշվի կառնվի սույն համաձայնագրի 6-րդ կետով սահմանված կարգով:

9. Սույն սակագնային համաձայնագրի դրույթները որպես լիցենզիայի պայմաններ ամրագրվելու են հանձնաժողովի կողմից նոր ընկերությանը տրամադրվող բաշխման գործունեության լիցենզիայում: Լիցենզիայի և սույն Համաձայնագրի պայմանների հնարավոր անհամապատասխանության դեպքում գերակայում են Լիցենզիայի պայմանները:

10. Կողմերը համաձայնվում են, որ գործունեության լիցենզիայի կամ բաժնետոմսերի առուվաճառքի պայմանագրի պայմանները խախտելու դեպքում հանձնաժողովը կարող է կիրառել համապատասխան միջոցներ, ընդհուպ մինչև սակագնային մարժայի նվազեցում:

Ի վկայություն վերը շարադրվածի, կողմերի լիազոր ներկայացուցիչները ստորագրեցին սույն սակագնային համաձայնագիրը և փաստեցին, որ նշված դրույթները կգործեն նաև _____ և _____ ընկերությունների միաձուլումից (միացումից) հետո վերակազմակերպվող նոր բաշխող ընկերությանը հանձնաժողովի կողմից գործունեության նոր լիցենզիա տրամադրելու օրվանից, որում կամրագրվեն նաև այլ դրույթներ, ներառյալ՝ սպասարկման որակի ցուցանիշները:

անուն, ազգանուն

պաշտոնը

ստորագրություն

անուն, ազգանուն

պաշտոնը

ստորագրություն